



KENYATAAN MEDIA
PEJABAT MENTERI PEMBANGUNAN USAHAWAN DAN KOPERASI
EWON RASMI HOTEL KOPERASI MOCCIS, TERIMA SUMBANGAN
BANTUAN BANJIR PENAMPANG

KUALA LUMPUR - Menteri Pembangunan Usahawan dan Koperasi Datuk Ewon Benedick merasmikan De MOCCIS Boutique Hotel milik Koperasi Pegawai-Pegawai Melayu Malaysia Berhad (MOCCIS) dan Sambutan Ulang Tahun ke-90 koperasi itu.

Pada majlis itu beliau yang juga Ahli Parlimen Penampang turut menerima sumbangan sebanyak RM15,000 daripada MOCCIS untuk mangsa banjir di Penampang.

“Bagi mewakili penduduk Penampang, saya merakamkan ucapan terima kasih dan menghargai keprihatinan semua agensi kementerian, koperasi-koperasi dan semua yang terlibat atas sumbangan ikhlas membantu mangsa banjir di Penampang.

“Terima kasih kepada MOCCIS atas sumbangan yang diberikan. Begitu juga dengan SKM dan IKMA yang turut bersama saya turun padang menyampaikan sumbangan kepada penduduk yang terjejas banjir di Penampang pada Selasa dan Rabu lalu,” katanya.

Beliau berkata demikian ketika berucap merasmikan Sambutan Ulang Tahun ke-90 MOCCIS dan Perasmian De MOCCIS Boutique Hotel, di sini, hari ini.

Turut hadir, Pengerusi Suruhanjaya Koperasi Malaysia (SKM) Leftenan Jeneral (B) Datuk Ahmad Norihan Jalal, Pengerusi MOCISS Ahmad Sobri Wan Teh dan pegawai-pegawai SKM dan koperasi.

Mengenai koperasi itu, Ewon berharap koperasi itu terus berkembang maju dan menyumbang kepada ekonomi negara.

“MOCCIS mempunyai pelbagai perniagaan dan perkhidmatan yang semakin berkembang seiring dengan 90 tahun penubuhan koperasi ini dan menjadi antara koperasi Melayu tertua dan terunggul di Malaysia.

“Peranan koperasi amat penting sebagai pelengkap kerajaan dan sektor swasta mengisi ruang-ruang kosong dalam membangunkan negeri dan negara amnya,” katanya.

PEJABAT MENTERI PEMBANGUNAN USAHAWAN DAN KOPERASI
4 JULAI 2024